

3 rakyat Malaysia gagal seludup dadah

22 Mei 2022

3 rakyat Malaysia gagal seludup dadah

Semua suspek
kena tahan
di lokasi berbeza
di Singapura

Singapura: Tiga rakyat Malaysia ditahan susulan cubaan menyeludup kira-kira 17.7 kilogram heroin, 261 gram 'ice' dan dua gram pil ecstasy di Pusat Pemeriksaan Woodlands pada Rabu lalu digagalkan Penguasa Imigresen dan Pusat Pemeriksaan

Singapura (ICA).

Penemuan itu mendorong operasi penguatkuasaan oleh Biro Narkotik Pusat (CNB), dengan tiga lelaki warga Malaysia berumur antara 23 hingga 28 tahun termasuk pemandu kereta, ditahan di lokasi berbeza di Singapura dalam tempoh dua hari.

"Dadah yang dirampas dianggarkan bernilai hampir S\$1,295,000 dan mencukupi bagi menampung penggunaan kira-kira 8,430 penagih heroin dan 150 penagih 'ice' untuk seminggu," kata ICA dan CNB dalam satu kenyataan bersama.

Pada petang Rabu lalu, kereta yang didaftarkan di Malaysia itu

memasuki lorong pemeriksaan imigresen di Zon Ketibaan dan menjalani pemeriksaan rutin.

"Bungkusan dipercayai dadah ditemui dalam bonet kereta. Pemandu warga Malaysia berusia 28 tahun itu segera ditahan dan dirujuk kepada CNB untuk siasatan," katanya.

Sementara itu, dalam operasi susulan dijalankan pada awal pagi Khamis lalu pula, CNB berjaya menahan dua lelaki warga Malaysia disyaki penerima bungkusan itu di sekitar Bedok North Street 1.

Pihak berkuasa berkata, siasatan berhubung kejadian sedang dijalankan. **BERNAMA**



Kira-kira 17.7 kilogram heroin dan 261 gram 'ice' dirampas di Pusat Pemeriksaan Woodlands.